

REGIONAL NEWS BULLETIN

HEADLINES (EVENING)

- 1. Health Minister Pi Lalrinpuii'n Mizoram Universal Healthcare Scheme tihchangtlun nan sorkar damdawi in te thawm that a, Nurse leh thawktu dang lak belh tum mek a ni a ti.
- 2. Chakma Autonomous Dist Council a Village Council Inthlanpui ah BJP in VC la hnem berin VC 88 ah VC 64 an la.
- 3. Union Home Minister Amit Shah an naktip Inrinni khian Zokhawsang-a Assam Rifles insawn tur thlahna hun a hmanpui dawn.
- 4. External Affairs Minister Dr.S.Jaishankar leh Union I&B Minister Ashwini Vaishnaw ten New Delhi-ah World Audio, Visual and Entertainment Summit (WAVES) 2025 lo awm tur an phochhuak.



HEALTH MINISTER

Health & Family Welfare Minister Pi Lalrinpuii'n Mizoram Universal Healthcare Scheme tihchangtlun nan sorkar damdawi in te thawm that a, Nurse leh thawktu dang lak belh tum mek a ni a ti.

He thu hi vawiina Assembly rorel inkhawma zawhna leh chhanna hunah sawiin, Health Minister chuan sorkarin damlo enkawltu tur Staff Nurse ti-a sawi thin, Nursing Officer 40 leh Ward Superintendent ti-a sawi thin, Sr. Nursing Officer - 10 lak a tum mek a, Mizoram Universal Healthcare Scheme tihchangtlun nan sorkar damdawi in te thuam that tum a ni a, chumi atan chuan casual nurse 300 bakah, lab technician, X-ray technician, consulting doctor leh thawktu dangte lak tum an ni a, ICU function tir a ni dawn bawk a ti.

Health Minister chuan zawh belhna chhangin, Kulikawn damdawi in sakna atan cheng vbc 34.75 leh Psychiatry Ward atan cheng vbc 20.24 ruahman a ni a, concept note chu pawm a ni tawh a, DPR chu PWD-in siam mek tih a sawi a, CSR atangin mi 34 lung zai a ni tawh a, zai chhunzawm zel a ni ti a, Mizoram chhung hmun hrang hranga Sub centre te sa tha turin hmalak mek a nih thu House a hrihl bawk a ni.



CADC VC ELECTION

Chakma Autonomous Dist Council a Village Council Inthlanpui ah BJP in VC la hnem berin VC 88 ah VC 64 an la.

CADC huamchhunga VC Inthlan neih zawh taka vote tla te chu tluang takin chhiar zawh a ni a. CADC chhungah hian Village Council 88 a awm a, BJP-in VC la hnem berin VC 64-ah hnehna an chang a, ZPM-in dawtin VC 12-ah an la a, MNF-in VC 8 - lain, Independent-in VC pahnih an la a, chak zawk hriat lohna VC 2- a awm.

CADC chhungah Village Council seat - 516 General - 428 leh Reserved- 88 a awm a. Seat mal anga chhiar chuan BJP in Seat 366 – General Seat 304 leh Reserved Seat 62 lain, seat an la hnem ber a. ZPM in dawtin General Seat 67 leh Reserved Seat 14, a vaiin Seat 81 an la, MNF-in Seat 45 – General Seat 38 leh Reserved Seat 7 lain,, INC in General seat -1 leh Reserve Seat - 1 a vaiin seat 2 lain, Independent Candidate in seat 22 – General 18 leh Reserved 4 an chang.

VC 88 awmna Chakma Autonomous District ah nimin khan vote thlak a ni a, Vote hi zaa 82.47 tlain, nizan khan Returning Officer te kaihhruaina hnuaiah Vote chhiar nghal a ni a, Inthlanna buaipututen vawiin khan Lawngtlai DC Office thlengkimin, inthlanna a lehkha pawimawh leh tuldangte District Election thuneitute kutah an hlanfel a ni.

BJP Mizoram chuan thuchhuah siamin, Village Council inthlan pawimawhzia ahria a, khawtlang hmasawna siamna kawnga hma latu pawimawh tak a nih avangin, CADC mipui te'n BJP ah rinna an nghat ngam leh hmasawna tha zawk beiseina an neih na hian, mitin thleng hmasawna-Development for All thlenna atan BJP lo chu a awm lo a ni tih ati chiang hle ah an ngai an ti a. CADC a BJP kaihhruai Sorkar ah rinna an nghat ngam a, an beisei ang ngei Development CADC Mipuite'n an hmuh theih nan BJP Mizoram Headquarter chuan hma an la pui dawn a ni, an ti.

<><><>

UNION HM VISIT

Union Home Minister Amit Shah chuan naktip Inrinni khian langin Mizoram a rawn tlawh dawn a, hetah hian Zokhawsang-a Assam Rifles insawna puala hun hman a tel pui ang.

Vawiina Assembly thutkhawmah Speaker Pu Lalbiakzama chuan Chief Minister sawmna angin Union Home Minister Amit Shah chuan inrinni ah Aizawl a tlawh dawn a ti a, hetah hian Assam Rifles te Zokhawsanga an insawn theihna tur thlahna function chu 23 sector Assam Rifles Khatla ah chawhnu dar 3 ah hun hman tur a ni tih a sawi bawk.

Union Home Minister Pu Amit Shah-a'n inrinnia Headquarters 23 Sector Assam Rifles, Khatla a panna tur kawngpui dung Bawngkawn-Chaltlang-Chanmari-RamhlunRoad-Chanmari, Zarkawt, Dawrpui, Treasury Square, Tennis Court, Khatla leh Lengpui Airport a panna tur kawngpui dung Khatla atanga Vaivakawn/Company peng atanga Lengpui Airport- Sakawrtuichhun Road inkarah chhun dar 12 atanga tlai dar 4 thlengin chawhmeh emaw thil dang zuara in pho a theih dawn loh tih Aizawl DC chuan thupek a chhuah a. Parking Area nilo kawngpui dungah eng lirthei chi mah hun phal a ni lo bawk a ni.

Assam Rifles Zokhawsang-a insawn tur chungchang hi nikum October ni 23 khan Mizoram sawrkar leh Assam Rifles aiawh ten New Delhi Mizoram House ah inremna an ziaak tawh a, he inremna ah hian Assam Rifles te chuan Lammual leh a chhehvela Assam Rifles hmun, Unit Hospital, Loch House, Quarter Guard leh hmun dang an chhuah san ang a, hetihlai Assam Rifles 23 sector Headquarter Khatla ami leh DIG chenna Raj Bhavan bul ami chu an chhuahsan dawn lo a ni.

Sawrkhar hotute sawi danin Assam Rifles in ram an chhuahsan tur te hi Restriction of Use of Transferred Land Act 2022 tlawh chhanin Mizoram sawrkhar ram a ni nghal dawn a ni.

Aizawl khawpui atanga Assam Rifles Zokhawsang-a sawn chungchang hi kum 1988-a Pu Laldenga kaihhruai MNF Sawrkhar lai atanga intan a ni a, kum 2019 khan Union Home Ministry chuan Assam Rifles te chu Zokhawsang-a insawn turin thu alo pe tawh a, hei hi harsatna hrang hrang Assam Rifles lamin an sawi avangin tih khawtlai a ni a, hemi hnu hian hmalakna hrang hrang kalpui niin kum 2023 khan Union Home Minister Amit Shah chuan Assam Rifles Zokhawsang Complex chu alo hawng tawh a ni.

<><><>

ACCIDENT

Vawiin chawhma dar 10:00 vel khan Lunglei district huam chung Belthei khuaah retaining wall laih laia ko pang chim in, mi 2 a delhhlum.

He kopang chim hian Naupang pakhat Zothanmawia (13) Cheuva, Belthei khaw mi fapa leh Vanmawia kum 29, Lallawma Belthei khaw fapa a delhhlum a, Lalrinawma kum 27 mi, Lalrinsanga Belthei khaw mi fapa erawh chuan hliam na lutuk a tuar lo nia hriat a ni. He chhiat tawh dan hrechiang tur hian Lungsen Police station staff te a hmunah an kal nghal a ni.

<><><>

MPCC

Mizoram Pradesh Congress Committee chuan Lawngtlai West Bialtu MLA Pu C Ngunlianchungah Anticipatory Bail la tura a tih chungchangah khawi court ah nge thubuai a neih tih Mizoram mipuite hrilh turin Chief Minister an phut.

Vawiin khan Aizawl Press Club ah chanchinbumite kawmin MPCC Treasurer Dr Lalmalsawma Nghaka chuan Chief Minister chu mahni MLA puite thamlo leh invauna anga ngaihtheih turin a tawng tih sawiin Mizorama rorelna in sang ber Assembly House a tihbawrhban phah hle a ni a ti a ni.

(Byte)

Dr Lalmalsawma chuan Chief Minister in LADC CEM Pu V Zirsanga nen an inbiaknaah Provincialised School 18 LADC kuta hlan te, Ngengpui Wildlife Sanctuary leh Phawngpui National Park te, Officer Post 20 dawn lakna tur permission pek bakah CEM Bangla tur SASCI hmanga thawh nghal te a tiam ni a sawi te chu a tiam reng em tih Mizoram mipuite hmaah puang tura an duh thu a sawi a ni.

Dr Lalmalsawma chuan ZPM chu lalna leh thuneihna an neih theih nan chuan special court in thiamloh a chantir tawh pawh LADC lu ber ni tura an la dah zel chuan corruption engahmah an ngaih loh zia a ti lang chiang hle a ni, a ti bawk.

<><><>

WORLD KIDNEY DAY

Aizawl Civil Hospital Senior Medical Superintendent Dr ST Lalruatfela chuan Mizo mipuite chu hriselna kawnga inzirtir that a pawimawh, a ti.

He thu hi vawiina Mizoram Kidney Transplant Association leh Civil Hospital Aizawl tangkawpin a buatsaih World Kidney Day 2025 Doctor’s Seminar Room, Civil Hospital Aizawl a neihah sawiin Dr ST Lalruatfela chuan taksa Insawizawi, ei leh in fimkhur bakah zuk leh hmuam laka fihlim a pawimawh em em a. Hmasawwna chu a khingbai lova a famkim tur a ni a ti a. Insumtheihna nei tura in fuih nasat a ngai in a pawimawh a ni, a ti.

Kumin World Kidney Day thupui atan hian ‘I kal a hrisel em? A that lohna a awm chuan zawng chhuak vat la, I kal hriselna vawng him rawh tih a ni a. Thupui hmang hian Civil Hospital Aizawl Nephrologist Dr Malsawmkima’n kalkhawmte a zirtir a ni. He hunah hian kal thlak tawhte leh phal tak an kal lo petute bakah kal thlak kum 20 aia rei dam te chawimawina hun hman a ni.

Mizoramah hian kal thlak 300 chuang awm tawhin chung zinga mi 250 vel chu an la dam nia chhinchhiah a ni a. Tun dinhmunah Mizoramah kal thlak zinga dam rei ber chu a kal thlak atanga kum 31-na hmang Pu RK Vanlalrema a ni a, kal thlak tawh zingah nu 2 in fa an hring tawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

WAVES

External Affairs Minister Dr.S.Jaishankar leh Union Information and Broadcasting Minister Ashwini Vaishnaw te chuan vawiin khan New Delhi-ah World Audio, Visual and Entertainment Summit (WAVES) 2025 lo awm tur khawvel hmaah an phochhuak. Media leh in awmleina lam tih hmasawinna turin WAVES hmanga sawrkar hmalak theihna hrang hrangte he hunah hian tarlan a ni a. Ram hrang hrang atanga sawrkar aiawh leh palai kalkhawmten media leh entertainment lama chak zawka hmalakna tur kawng chi hrang hrang an entir dawn bawk a ni. WAVES Summit vawi khatna hi kumin May ni 4 hian Mumbai-ah buatsaih a ni ang.

<><><>